



26. januar 2015

UPA2015/56

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Aalisarnermut immikkoortitat pillugit Inatsisartut inatsisaata allanngortinnissaanut Naalackersuisut peqquneqarnissaannik Inatsisartut aalajangiiffigisassaattut siunnersuut, taamaalilluni isaterinissamut tapiissutinik akiliuteqarnermi aalisarsinnaanermut akuersissutit siunissami atorunaarsinnissaat periarfissaajunnaassalluni.

(Inatsisartunut ilaasortaq Hans Enoksen, Partii Naleraq)

Tunngavilersuut:

Aalisarnermut aningaasaliissutinut immikkoortitat pillugit Inatsisartut inatsisaat nr. 15, 20. november 2006-imeersoq, ilaatigullu 2. december 2009 Inatsisartut inatsisaatigut nr. 13-kkut allanngortinneqarsimasoq, naapertorlugu, angallammik piginnittup isaterinissamut tapiissutinik pissarsinerani, akuersissutip atorunnaarsinneqartarnera pingaarnertut maleruagassaavoq:

“§ 16. Tapiissutit akilernerini angallat piviusumik isaterneqassaaq.

Imm. 2. Isaterinissamut tapiissutit tunniunneqarnerini aalisarsinnaanermut akuersissut aamma inuussutissarsiutigalugu aalisarnermut akuersissutit tamarmik atorunnaassapput. Angallat umiarsuit nalunaarsuiffiannit, aalisariutit pillugit nalunaarsuiffimmit, imaluunniit Angallatit nalunaarsuiffiannit, aamma Aalisarnermut, Piniarnermut Nunalerinermullu Aqutsisoqarfiup inuussutissarsiutigalugu aalisarnermik ingerlatsinissamut akuerissuteqartutut angallatit pillugit nalunaarsuiffianit peerneqassaaq.”

Pingaarnertut maleruagassami pineqanngitsutuaq tassaavoq § 16 imm. 3:

“Imm. 3. § 16 imm. 2-mi oqaaseqatigiit siulliit atuutissanngillat aalisartut marluk amerlanerilluunniit ataatsimut angallatiminnut isaterinissamut tapiissutinik qinnuteqaateqarsimappata, ilutigalugulu angallammik nutaamik ataatsimik (1) ataatsimoorlutik pissarsiniarnermut tapiissutinik qinnuteqaateqarsimappata.”

Inatsisit atuuttut aalisartunut nutaanngilisunik angallatilinnut annertuumik ajornartorsiortitsilersimapput. Tassami isaterinissamut tapiissutinik aalisartoq pissarsia-

qarsimappat, taava aalisartog aalisarsinnaanermut akuersissummik pigisaanik arsaarneqartarpoq, taamalu inuussutissarsiutiminnit tunuartariaqalersarput.

Partii Naleraq isumaqarpoq, aalisariutit nunatsinni assorujussuaq nutaanngilini-kuusut, isumaqarpugullu nutarterinissaq pisariaqartinneqartorujussuusoq, kisianni massakkut aalisariutinik nutarterinissamik periarfissat taamaallaat killeqartut. Angallammi pisoqaaq nutaamik taarserneqassappat tunngavigineqassaaq allamik imaluunniit allanik kattusseqateqarnissaq, taamaaliunngikkunimmi akuersissummik arsaarneqartussaagamik Aalisartut taamaalillutik ajornartorsiulissapput, tamatumanimi aalisartog inuussutissarsiumminik attassiinnarnissaminik ajornartorsiulis-saaq.

Ingerlariaqqinnginnisamik ajornartorsiut tamanna allanngortinneqartariaqarpoq. Tassalu siunnersuutigaara aalisariut aserorterneqarpat aalisartog akuersissummik arsaarneqassanngitsoq, ingerlariaqqinnissaanullu periarfissinneqassasoq.

Aningaasaqarnikkut allaffissornikkullu pisortanut kingunerisassat:

Siunnersuut atugassiissutaareersut saniatigut allaffissornikkut aningaasaqarnik-kulluunniit pisortanut kinguneqartussatut ilimagineqanngilaq.

Namminerisaminnik inuussutissarsiutilinnut aningaasaqarnikkut allaffissornik-kullu kingunerisassat:

Siunnersuutip inuussutissarsiortunut aningaasatigut iluaqutissartaqarnissaa ilimagineqarpoq isaterinerup kingorna qinnuteqartut aalisarnermut akuersissutitik pigiinnarsinnaammatic.

Aningaasatigut iluaqutissartaata qanoq annertutiginissaanut piginnittup angallammut sumut akuersissuteqarnera apeqqutaassaaq. Taamaattumik aningaasatigut qanoq annertutigisumik iluaqutissarsiviusinnaanera oqaatigiuminaappoq.

Innuttaasunut aningaasaqarnikkut allaffissornikkullu kingunerisassat:

Siunnersuutip aningaasatigut allaffissornikkullu inuussutissarsiortunut aningaasatigut kingunerisassaataut taaneqareersut saniatigut innuttaasunut allanut kinguneqarnissaa ilimagineqanngilaq.